


Эно Рауд



Сипсик – ловья акань



Эно Рауд

СИПСИК — ЛОВЪЯ АКАНЬ

Сыктывкар 2006

Эст кывйысь комиӧдіс Цыпанов Йӧлгинь

Висьткудсӧ йӧзӧдӧма «Рытыв-войвыв телеком» восьса акционер кортырлӧн «Коми республикаса связь» юкӧнӧн сетӧм сьӧм вылӧ. Вуджӧдчысь сьӧлӧмсянь аттьӧалӧ котырсясӧс тайӧ бурвӧчӧмсьыныс, коми челядьлы козин сетӧмсьыныс

Рауд Э.

Сипсик — ловъя акань. – Сыктывкар, 2006. – 36 лб.

Коми ныв-пилы йӧзӧдӧм тайӧ небӧгас чукӧртӧма челядьлы нималана эст гижысь Эно Раудлысь Сипсик нима ловъя акань йылысь медся тӧдчана висьтъяссӧ. Вайӧдӧм висьтъяссӧ кольӧм нэмын нин вӧлі вуджӧдлӧма суоми, немеч, венгр, роч да мукӧд кывйӧ, Э.Раудлысь небӧгъяссӧ йӧзӧдлӧма уна канмуын, но коми лыддысьысь челядьлы татшӧм комиӧдӧмыс ӧнӧдз эз на вӧвлы. Небӧгсӧ лӧсьӧдӧма кык висьткудйысь: 1978-ӧд воын Таллинын йӧзӧдлӧм «Сипсиклӧн висьтъяс» да 1969-ӧд воын сәні тшӧтш йӧзӧдлӧм «Кирью-Мирью» небӧгъясысь. Коми муын тайӧ нейджыд висьткудйыс лои ордвуж фин-угор гижысьяслысь гижӧдъяссӧ торъя небӧгӧн медводдза йӧзӧдӧмтор. Чайтам, тайӧ висьтъясыс воасны сьӧлӧм выланыс коми челядьлы дай налӧн ай-мамныслы.

© Рауд, Э., 2006.

© Цыпанов, Й., (вуджӧдӧм), 2006.

Март, Ану да Сипсик

Март да Ану чоя-вока.

Öти лунö Март локтіс пöрысь мамыс дорö да шуис:

— Анулөн регыд чужан лун.

— Да,— вочавидзис пöрысь мам. — Анулы регыд тырас вит арöс.

— Ме кöсья сылы чужан лун кежлас мыйкö вöчны, — шуис Март. —

Кöсья сылы вöчны мича акань.

— Вöч инö акань,— вочавидзис пöрысь мамыс.

— Сöмын ме кöсья пырысьтöм пыр аканьсö вöчны, — шуис Март. —

Дай ог кутшöмкö омöлик кабалаысь.

Пöрысь мам кöсьысис петкöдлыны Мартлы збыль аканьсö кыдзи вöчöны. Сійö босьтис паськöм видзан шкапысь кöлуй чукөр да вата, перйис пызан кудйысь кысян-вурсян эмбур тыра көрöб. Сэни пöрысь мамыслөн вöліны шыраньяс, сунис трубичаяс да шöрт тупыльяс, ем доз да нöшта на чунылыс.

Пöрысь мамыс велöдис Мартöс вöчны збыль аканьсö тадзи:

— Акань мыгöрсö колö вундавны кöлуйторьясысь да сэсся öтлаö вурны, сы бöрын топыда тöбны, — шуис пöрысь мамыс. — Ставыс кор лоас дась, сэки юрас серпасав чужöм да пукты сунисысь юрси.

Сідзи и кутіс вöчны Март Анулы чужан лун кежлас акань. Медводдза лунö вöчис вир-яй, аканьлысь мыгöрсö. Мöд лунö вöчис юр. Коймöд лунö вöчис кык ки. Нельöд лунö вöчис кык кок.

Ставсö тайöс вöчнысö вöлі сэтшöм сьöкыд, кымынысь кö öд пыраліс емыс чуныс. Сійö сэтшöма доймис, öтчид весиг Март бöрдіс. Сэк жö мөвпыштис, мый Анулы лоö зэв нимкодь, козьналас кö сылы чужан лун кежлас сійö акань. Сэсся вурис мыгөр вылас юр, кык киөн-кокөн. Медбöрти аканьыс лои дась. Сöмын тайö эз на вöв мича акань.

— Эн шогсы, — шуис Мартлы пöрысь мам. — Медтöдчанаыс — сійöс тэ ачyd вöчин.

Но Март век на жугыль вöлі. Сійö босьтис аканьсö да мунис мöд вежöсö.

— Тайö кутшöмкö абу лючки акань, — шуис сійö. — Кутшöмкö сипсик¹.

Öтпыр сэсся друг кылис вöсньыдик гөлöстор:

— Эн бöрд нинöмсьыс! Ме, дерт, абу вывті мича, но бара менам абу некутшöм тырмытöмтор.

Март пырысь-пырсö эз гөгөрво, кытысь тайö сёрниыс кылö. Медбöрын казялис: тайö вöлөм сёрнитö асвöчөм аканьыс. Сійö, сідзкö, сёрнитö!

— Кыдз-тадз? — чуймис Март. — Тэ öмöй тшöтш кужан сёрнитны?

— Кужа, — вочавидзис акань.

— Мый тэнад нимыд? — юалис Март.

— Сипсик, — шуис акань. — Тэ öд ачyd сетін меным тайö нимсö.

— Кыдзи нö тэ кужан сёрнитнытö? — бара чуймис Март.

— Тэ сэтшöм ёна кöсйин вöчны Анулы буртор, вöчин менö сэтшöма радейтöмөн, мый ме таысь збыльысь ловзи, — шуис Сипсик. — Збыль öд зэв бур, мый ме ловзи?

— Дерт бур! — шыасис Март. — Öнi тэ лоан Анулы, тöдöмысь, зэв бур козин!

Сідзи вочасөн матыстчис Анулөн чужан луныс.

Анулөн нимлунö

Рытнас, узьны водігас, Ану вöлі сöмын на нель арöса. А чужан лун асылö садьмигас сійö лои нин вит арöса. Тайö вöлі ыджыд чуймöдантор, öд татшöм ногөн сійö другөн öти войö вит арöса лои. Тайö збыльысь лоöма тадз, öд пызан вылын крендельö вöчөм розьясын öзйö нин вöлі вит сись — быд во вылö öтиөн.

Козинъясыс вöліны сэнöсь тшöтш: мозаика да заводитан чöж (утка), зарни юрсиа акань да нöшта öти визя гача зэв тешкодь акань. Сэсся матыстчисны ай-мам, пöрысь мамыс да Март, ставныс сиисны сылы ыджыд шуд. Да Март вашкöдыштис пеляс:

— Эсійö сунисысь юрсиа аканьыс Сипсик. Сійö ловья.

И друг кылис вöсньыдик гөлöстор.

¹ Сипсик — нюскысь, эст кыв вылысь вуджöдöмөн кö.

— Ыджыд шуд чужан лунө!

Тайөс шуысыыс вөлі Сипсик. Өні Ану гөгөрвоис: Сипсик збылысы ловья, сійө Сипсикысы зэв рад лои. Эсійө зарни юрсиа акань дорсыыс ёна радджык, көтө аканьыслөн вөлі турунвиж платтё да сійө тшөтш ёна воис сьөлөм вылас Анулы.

Анулөн серпаскуд²

Ану да Март өтчыл ветлісны баты-мамыскөд гөститны дядь ордас. Сэні вөлі уна интереснөйтөр, өд дядьыслөн вөлі уна рөмөн петкөдлан серпаскуд да найө дыр сійөс видзөдісны. Анулы торйөн воис сьөлөм вылас өти мультфильм, аканьяс сэні тешкодья вөлі йөктөны, а өти акань весигтө сьылө вөлі.

Мөд луннас Ану тшөтш көсйис вөчны аслыс уна рөмөн петкөдлан серпаскуд — медым мөдысы на бур мультфильмсө видзөдны. Март гортас эз вөв. Ану сэк думыштис, мый вермас ачыс заводитны вөчасьны. Сійө перйис став чачасө ворсанторьяс видзан көрөбысы да бергөдіс сійөс бок вылас. Восьсаинас сійө ляскис еджыд кабаала. Ляскытөдзыс сійө серпасалис кабаалаас мультфильмын ворсысы аканьясөс. Серпасалис тшөтш өти понмөс, но сійө збылысысө вөлі сэтшөм жө акань, өд мультфильмын ставыс аканьяс — йөз да пемөсыяс.

Ставыс лои дасы да Ану кутис асыыс мультфильмсө видзөдны. Сөмын мыйлакө тайө вөлі гажтөм кино — пон вөтчис кык зонка бөрся да некыдзи найөс эз вермы кыйны. Сэки Ану видзөдіс сійө фильмсө мөд ногөн. Өні тайө вөлі нин неуна бурджык кино: лев вөтчис кык негр бөрся, но эз жө вермы вөтөдны найөс.

Та бөрын Ану мөвпавны пондіс, кутшөм кино нөшта на видзөдны. Тшук сэки вежөсө пырис Март. Сійө казьяліс, төдмаліс Анулысы серпаскудсө да юалис:

— Мый тайө?

— Тайө менам уна рөмөн петкөдлан серпаскуд, — шуис Ану.

— Тайө некутшөм абу серпаскуд! — горөдіс Март.

— Мыйла абу? — юалис Ану.

— Тайө өд сөмын тыртөм көрөб, — шуис Март. — Телевизор пытшкас век овлө аппарата — быдсыяма сикас сутугаторьяс да трубкаяс. Колө тшөтш гыкутан³, медым сійө гыяссө куталө.

² Серпаскуд — телевизор.

³ Гыкутан — антенна.

— Кутшөм гыяс? — эз гөгөрво Ану.

— Сійө гыяссө, кодьяс телевизорө ортсысяньыс пырöны, — шуис Март.— Синмөн найöс он аддзы. Но сэсся антеннаыс кыйö гыяссө, а серпаскуд артмөдö тайö гыяссыйс серпас. Но тэ ичöt на да он гөгөрво тайöс ставсö!

Ану жугыльмис таысь: öд ставсö сійö оз гөгөрво, дай сылөн серпаскудыс некытчö пö оз туй. Но Март шуис:

— Вöчам тэнад серпаскудö тшötш гыкутан!

— Вöчам! — гораа шыödчис Ану.

Найö босьтисны пластилин да вундисны сыысь гөгрöс кытш. Сійö лои антенналы подув. Сэсся сатшкисны сэтчö рöма кык карандаш. Тадзи гыкутаныс дась лои.

— Сöмын со серпаскуд пытшкас мыйкö оз тырмы, — шуис Ану.

Мартлөн вöли кöv, и сійö шуис, мед пö тайö кöлыс лоö сутуга, сійö пö быть колö серпаскуд пытшкö. Сэсся Март ваис посводзысь öти трубка, сійö бовьялö бус чукöртан машина⁴ бокын. Сійö шуис, тайö трубкаыс пö вермö зэв бура вöчны гыясысь серпас. Найö лöсьöдисны сутугасö да трубкасö серпаскуд пытшкö. Öни сійö лои дзик збыль серпаскуд кодь.

Друг кодкö шуис Анулы:

— Ме кöсья телевидениеын ворсны.

Тайö вöли Сипсик.

— Ок, кутшөм бур! — горöдис Март.

— Но кызди сійö серпаскуд пытшсьыс кутас тыдавны? — думыштис Ану.— Сы водзын öд лоö кабала.

— Экрансö колö выльысь вöчны, — шуис Март. — Да со личканыс⁵ тшötш абу.

Март нетшыштис бөр еджыд кабаласö көрöб вомысь да серпасалис улас сэтчö ёсь дорышьяса личканьяс. Сэсся босьтис шыран да вундис сыысь нель пельöса розь. Кабаласыс колины сöмын дорышьясыс. Кор ставыс дась лои, сійö бөр ляскис кабалаысь тайö дорышьяссö көрöблөн осьсаинö.

Анулөн серпаскудыс öни лои дзик уна рöмөн петкөдлан серпаскуд кодь, сöмын мультфильмыс эз нин вöv: серпассö Март вундöма да сы пыдди лоöма сöмын тыртöм көрöб.

Сöмын сэтись немтор эз тыдав да та понда Сипсик ачыс кöсйысис серпаскудын ворсны.

Ану Марткөд отсалисны Сипсиклы пырны серпаскуд пытшкö да кутисны виччысьны, мый öни сійö кутас вöчны.

Сэсся Сипсик налы копыртчылöмөн шуис:

⁴ Бус чукöртан машина — пылесос.

⁵ Личкан — кнопка.

— Заводитам челядьлы телеуджтас⁶. Ворсö Сипсик.
Сипсик сэсса сьыліс:

Вир-яйöй менам — дөрөм сос,
Важ чувки — менам юр.
Да кыз быд рузум акань со,
Гырк пытшкам вата тыр.

Ме йöкта, уна кывбур тöда,
Бур сьылысь со öд ме.
И заводиттöг ворсны мöда —
Ас пытшкын олөм эм.

Сипсик налы бара копытчыліс, сэки уджтасыс помасис. Ану да Март көсйисны гижны телевидение вылö сы йылысь, мый налы зэв ёна воис сьөлөм выланыс Сипсиклөн сьыланкывйыс.

Сипсик видзöдö пыстаясöс

Тöлыс пуксис кöдзид, муас уси уна лым. Ануөн да Мартөн вöчөм лыммортыс сулаліс öшинь улын, мортыслөн киясас рос, и Ану радпырысь чайтö вöлі — тайö лыммортыс оз на лöсьöдчы сывны, со öд кутшөм тшапа сійö асьыс россö кутö.

Сöмын тай посни лэбачьяслы тöv сьөрсьыс вайöма уна шог. Найö эз вермыны судзöдны лым увсьыс сёян да сöмын тшыгысла чивзөмөн лэбалісны, чеччалісны гөгөр быд пельöсын. Корсисны, оз-ö сюр кутшөмкө кокалантор. Öти виж сьыліа пыста лэбзис дзик Март да Ану öшиньöдз, сэсса тангысис сэтчö нырнас, дзик быттьö коранмоз, медым чоя-вока сетасны сылы сёйыштны.

Сэки Март шуис аслыс, вöчас мый лэбачьяслы сёян керка.

Сійö перйис уджалан көлуй тыра асьыс көрöбсö да вель дыр пилитчис, стружитчис да тувьясис. Медбöрын лэбачьяслы сёян керка лои дась, батыс сэсса отсаліс Мартлы сійöс öшинь водзö öшöдны. Мам вайис чуланьсь ыджыд порсь тшöг тор да гартыштіс сійöс көвйөн сідзи, медым öшны лэбачьяслы сёян керка пытшкө. Пыстаяслы ёна кажитчис көв помын öшалысь порсь тшöгыс — та вöсна найö лэбзисны корны сэтчö мукöд пыстаöс.

Ану пуксис öшинь водзö лэбачьясöс виччысьны. Сійö пукаліс да виччысис, виччысигас весиг сылы гажтөм лои, ни öти пыста эз во да.

⁶ Телеуджтас — передача.

Друг Сипсик шуис чачаясөн тыра аслас пельөссянь:

— Ме тшөтш көсья лэбачьясөс өшинь вылын виччысьны.

Ану дзик пыр жө босьтис Сипсикөс да пуктис сійөс өшинювса пөв вылө виччысьны. Öнi Анулы эз нин вөв гажтөм виччысьнысө, өд Сипсик лои ськөд да найө өта-мөд костын варовитисны.

— Некедз ог төд, мыйла ни өти лэбач оз лэб,— мөвпалис Ану.

— Тайө өд дзик на выль сёянiн, — шуис Сипсик. — Лэбачьяс оз на төдны, мый танi өшалө татшөм ыджыд тшөг тор.

— Миянлы колө вешйивтөг виччысьны, — чөвтис Ану.

И найө ёна виччысисны. Друг лэбзис ичөтик, виж сьылиа пыста, пуксис сёян керка вевт вылө. Сійө вермис лоны тшук сійө пыстаыс, кодi тай таөдз нырнас өшиньө тангысьлис. Но вермис тшөтш лоны и дзик мөд пыста, пыстаясыс өта-мөдныскөд өткодьөсь да. Вевт вывсянь сійө лэбзис сёян керка пытшкө, сатшкысис кокъяснас порсь тшөгө да кутис ськөд өтвылысь көв помас троньявны.

Ану чеччыштис улөс вылысь, кекөначалис радысла кияснас да горөдис:

— Видзөд! Видзөд сійө кызди троньялө!

Виччысьтөг пыстаыс воши. Сійө сөмын чипсыштис: «Чип-чирик!» — шеныштис бордыснас да лэбзис сэтысь. Сөмын порсь тшөгыс көв помас век на троньялис.

— Ог төд, мый вөсна сійө пышйис-лэбзис? — шензис Ану.

Сипсик шуис:

— Тэ повзьөдин сійөс. Тэныд быть колө вөли пукавны ме моз жө лөня, сидзтө дерт сійө повзис.

Регыд пыстаыс бара воис. Öнi Ану пукалис Сипсик моз тшөтш лөня. Сійө ньөти эз вөр да сөмын пеляс Сипсиклы вашкөдис:

— Видзөд, кызди сійө кокасьө!

Найө кыкнанныс видзөдисны пысталысь тшөг кокалөмсө. Лэбачыс эз нин наысь пов. Бөрас сёян керкаө лэбзялисны нөшта мукөд пыстаяс. Ану да Сипсик пыр видзөдисны, кызди пыстаяс көв помас троньялисны да порсь тшөгсө кокалисны. Ану пыр зилис пукавны Сипсик моз лөня, Сипсикыс өд медся бура төдис, кызди колө видзөдны пыстаясөс.

Сипсиклөн гусятор

Öти лунө пөрысь мам да Ану колисны гортаныс кыкөн. Ай-мамыс мунисны удж вылө, а Март ывлаас вөли ворсө зоньяскөд, лымйөн накөд лыйсьө.

Пöрысь мамлөн да Анулөн вöлі быдөнлөн аслыссикас удж: пöрысь мам ноксис пусянінын, Ану вöчис Сипсиклы пугорьясысь велöдчанін. Ану öд чайтіс, мый Сипсиклөн регыд лоö школаö мунан кад.

Кор велöдчанін лои дась, Ану казяліс — гырысь уджъяс вöчигөн сылөн кынöмыс пондöма сюмавны. Сійö тöдіс: чуланас эмöсь асылын пöжалом öладдяяс. Ану мөвпыштіс, мый сылы эськө бурджык корны найöс пöрысь мамыслысь. Сöмын пусянінас сэки пöрысь мамыс эз вöv — сійö вöлі мунöма ёг-шыблас петкөдны. Ану тöдіс: пöрысь мамыс оз ло паныд сетны тшыг кагалы öладдя гоз да бөр пырис вежöсас. Пöрысь мамыслөн ывлаысь пырöм мыстыыс Анулы эз нин вöv окота корны öладдяссö сы кыысь, найöс сёйис нин да.

Ану пырысьтөм-пыр кутіс велöдны Сипсиклы шыпасьяс, медым Сипсик школаас мунігас мыйсюрö тöдыштіс нин. Кодыр Сипсик «А» шыпассö тöдмаліс, Ану велöдіс сэсся сійöс лыддысьны. Найö öтлаын лыддисны Анулысь серпасьяса небөгьяс. Но Ану тöдіс, мый айыслөн джаджас эм Китай йылысь зэв мича серпасьяса небөг. Анулы лои зэв окота петкөдлыны сійö небөгсö Сипсиклы. Ану тöдіс тшöтш öтитор: айыслысь⁷ небөгьяс оз позь вөрöдны. Сы вöсна сійö Сипсиклы шуис:

— Ме тэныд öні петкөдла Китай йылысь öти небөг, но тэ некодлы эн висьтав, мый тэ небөгсö аддзылін — тайö лоö мян гусятор.

Сэсся Ану босьтіс джаджсыс сійö небөгсö да петкөдліс Сипсиклы серпасьяс.

— Китай — зэв ыджыд канму⁸, сэні олö зэв уна китаеч, — висьтавліс сійö.— Став китаечыс вывті ёна радейтö рис сёйны. Сöмын вот ми сёямö риссö паньөн, а китаечьяс сёйöны бөдторьясөн.

— Кыдзи нö найö бөдторьяснас сёйöны? — шензис Сипсик.

А небөгас вöлі öти сэтшöм серпас — сэні öти китаеч бөдторьясөн вöлі рис сёйö. Кык вöсньыдик бөдтор сылөн вöлі öти и сійö киас, рисыс вöлі кык бөд костас. Ану петкөдліс сійö серпассö Сипсиклы, сэки сійö збылысь гөгөрвоис, кыдзи сёйлывлöны бөдторьясөн.

— А найö öладдясö тшöтш бөдторьясөн сёйöны? — көсйис тöдмавны Сипсик.

Тайöс Ану стöчасö эз тöд, сöмын чайтіс: öладдясö китаечьяс век жö бөдторьясөн оз сёйны. Сійö мөвпаліс, мый китаечьяс öладдясö вермасны кокныда чунь помсыс сёйны.

Кодыр став серпассö лои видзöдöма, сэки Ану Китай йылысь тайö небөгсö пунктіс бөр айыс джадж вылö. Сы бöрын нöшта шуис Сипсиклы:

⁷ Ай — отец.

⁸ Канму — государство, страна.

— Видзод, некодлы тайё небөг йывсьыс эн висьтав — пöрысь мамлы ни мамыдлы, некодлы. Мурö понпилы тшöтш эн висьтав, сы вöсна мый Мурö пыр жö висьталас каньлы, да сэки мян гусяторным став гортсалы лоö тöдса. Сипсик көсйысис, мортлы пö оз висьтав.

Колис некымын лун. Öтчид Ану аддзыліс горт дорысь каньсö, каньыс видзöдліс сы вылö сэтшöм мудера, быттьökö збыльысь тöдіс кутшöмкö гусятор. Анулөн пондіс сьөлöмыс висьны. Сійö пырис вежöсас да гусьöникөн юалис, эз-ö Сипсик збыльысь Китай йылысь небөг босьтлöмсö кодлыкö висьтавлы. Сипсик шуис, эг пö, дерт. Сöмын Анулөн сьөлöмыс мыйкö вöсна век на висис.

Сэки сэсса лои тайё. Рытъя нур⁹ дырйи став котырыслөн пызан сайын пукалігөн айыс друг чорыд гөлөсөн юалис:

— Коді видлаліс Китай йылысь небөгöс?

Ставөн ланьтöмөн олісны, морт нинöм эз шу. Медбöрын сэсса Ану зэв лöня шуис:

— Ми Сипсиккөд видлалімö. Сипсик зэв ёна көсйис сэтысь серпасьяссö видзöдлыны. Ме висьтавлі, мый тэнсьыд небөгтö оз позь чутöдны, да сійö көсйысьліс сэки, некодлы пö тайёс ог висьтав.

— Омöльтор сійö, мый тэ босьтлін небөгöс, — шуис бать. — Но ёна омöльдзык, мый тэ татшöм ногөн Сипсик вылö мыжтö вештан.

Öні нин Ану бөррдзис да шуис:

— Сипсикыс öд тшöтш висьтасис ме йылысь. Кытысь тэ сідзкö тöдмалін, ме мый небөгтö видлалі!

— Сипсикыд нинöм меным эз висьтавлы, — шуис айыс. — Чуньясыд тэнад сылаöсь вөлöмны да öні дона небөгöй сыла чутöсь.

Айыс сэсса Анукöд эз нин видчы. Кор пöрысь мамыс вайис пызан вылö юмовторьяс, Ану шуис, сійö некор нин пö айыслысь небөгьяссö оз вөрзöд да чуланысь öладдяс оз босьт, öд найö чуньяссö сылөсьтöны.

Сейöм бöрын Ану воис Сипсик дорö да шуис:

— Тэ меным öні зэв муса.

Сипсик шуис:

— Но öні ставыс бур.

⁹ Рытъя нур — ужин.

Шонді кутіс быд лун югъявны-пöжны век шоныдджыка. Лым сыліс, ывлаын ёна шонид вöлі нин. Кöні тай таöдз сулавліс Ану да Мартөн вöчöм лымморт, сэн öні вöлі ыджыдысь-ыджыд ва гөп, дзик быттьö ворсан ты. Горт гөгөр быдлаын вöліны ичөтджык гөпъяс да сылөминъяс костöд визувтісны ичөтик шоръяс, найö вöліны дзик ворсан шоръяс-юяс кодьöсь. Мукöдлаын лымйыс вöлі нин дзикöдз сылөма, муыс вöлі куш, но мукöдлаын тыдалісны тшөтш лымйысь мылькъяс да діяс. А сідзсö горт гөгөрын вöлі вывті гажа.

Сöмын гортын вöлі неуна гажтөмкодъ, Ану став аслас ворсанторнас вöлі нин ворсöма да эз төд водзö вöчны мый.

— Мый, Сипсик, тэ чайтан, ми öні кутам вöчны? — юаліс Ану Сипсиклысь.

— Чайта, ми вермим эськö петавны ывлаö, — вочавидзис Сипсик.

— Тайö збыльысь бур мөвп, — шуис Ану. — Сöмын миянлы колö тэнö пасьтöдны шонид кöлуйö, тулысын позьö чорыда кынмыны öд.

Сипсиклөн шонид паськөмыс эз вөв, та вöсна Ану босьтіс асьыс гөрд чышъянсö да ёна тубраліс сійöс. Сэсся Ану ывлаын ветлан паськөмасис.

— Видзöд, асьтö тэ эн кötөд-рез, сапöгад васö эн лэдз, — шуис мамыс. — Кötасьöмысь позьö чорыда кынмыны.

Ану көсйысис мамыслы, оз кут пö резьсыны ваөн, некор оз пыр пö гөптö.

Сэсся Ану да Сипсик петісны йөрö. Ану пунктіс Сипсикöс керка стен бердö пукавны да шуис:

— Видзöд, эн кынмөдчы. Тувсов шоныдыд ылөдчысь. Ворсөмөн да чеччалөмөн кö котралан, сэки он на кынмы сэтшöма. Пыр кö öтилаын пукавны кутан, сэки тувсов төлыс вермас вомөн төлөдны-кынтыны.

Горт гөгөр вöлі збыльысь лөсьыд. Ану босьтіс асьыс ворсан зыр, кутіс вöчавны тувсов валы туйяс. Сійö паськөдіс ворсан шорьяссö, шорьяс-тыяс костö перйис нöшта на выль шорьяс да тыяс. Нывка пыдіа перйис нöшта öти ыджыд ва туй, сійö лои веськыд да пыдын, ваыс сэті визувтіс öдйö. Сэсся чукөртіс пу чагьяс да лэдзаліс ваö, чагьясыс кывтісны водзö дзик ичөтик карабьяс моз.

Сідзи Ану ворсіс да дзикöдз вунөдіс Сипсик йылысь. А Сипсик пукаліс керка стен дорын, сылы зэв гажтөм вöлі. Ану эз казав, мый дзик Сипсик юр весьтын керка вевт дорышсянь вöлі öшалö йинёнъ. Сійö йинёнъсяньыс кутіс виявны, ставыс войталіс веськыда Сипсик юр вылө.

Мыйён ёнджыка шондiыс пöжис, йинёнъ сылiс век ёнджыка да Сипсик вöли ёна шогалö, сылөн öд нинём юрас эз вöv. Ворсöмсьыс вöлисти дугдём бöрас Ану аддзис — Сипсик лöма сулик ва.

— Коньöр Сипсик,— шуис Ану. — Миянлы колö котöрөн пырны бöр, кöтасьём вöснайд öд верман чорыда кынмыны.

Сiйö босьтiс Сипсикöс, котöртiс вежöсö да пуксьöдiс сiйöс шонид сетан батарея бердö, мед сiйö сэнi шоналас да косьмас.

— Видзöд, öнi эн висьмы, — тöждысис Ану. — Висьöмыд сiйö абу олём.

Сипсик эз висьмы. Мöдарö, висьысьыс лои Ану. Сiйö висьмис сэтшöма, мый ковмис збыльысь водны вольпасьö.

— Тайö зэв чуймöдантор, — шуис Ану Сипсиклы. — Кöтасин тэ, а висьми ме.

А Сипсик мövпыштiс: вермас лоны, Ану тувсов ваён ворсiгөн неуна кöтасис, ворсiгчöжөн сэсся эз казьяв, кьдзи кынмис тувсов тöv вылын.

Ану дыр кад куйлiс вольпасьын. Медым Анулы эз вöv гажтём, Сипсик пукавлывлiс öшинь дорышын да висьтавлывлiс нывкалы, мый вöчсьö ывлаын. Сiйö висьтавлiс, кьдзи став лымйыс сылiс, кьдзи пу увьяс вылын поталiсны гарьяс, кьдзи наысь чужисны ичöтик корьяс. Висьталiс нöшта, кьдзи ывлавывса вежыс лунысь-лун лои турунвижджык да весиг кьдзи öшинь сайсянь лэбзис уна рöма öти бобув.

Медбöрын Ану бурдiс, гөгөр ставыс нин сэк вежöдiс, пуюсын корьясыс вöлины нин гырысьсöсь, уна рöма да еджыд бобувьяс лэбалiсны гозйөн-гозйөн.

Сэсся Ану да Сипсик бара петiсны ворсны. Но тувсов ваён найö эз нин вермыны ворсны, öд став тувсов ваыс важөн нин кьтчöкö вöли визувтöма. Та вöсна ворсiсны найö мукöд ворсанён.

Сипсик гольгö таксиён

Ай-бать öтчид мöдöдчисны тьötö ордас чужан лунасьны, босьтiсны аскöдныс Ануöс да Мартöс. Сöмын тьötöыслөн эз вöv челядьлы ни öти ворсантор, та вöсна Ану аскöдыс босьтiс нöшта Сипсикöс, медым кодкöдкö чужан лунö ворсны жö. Мамыс эськö эз кöсйи Сипсикöс лэдзны, но бöрас век жö лэдзис. Сiдз найö мунiсны витөн: ай, мам, Март, Ану да Сипсик.

Тьötö ордын вöлины быдсяма сикас вия няньыс да пирожнöйяс, сöзваторс да какао. Верстьö йöз сöмын пыр сёйисны да висьтавлiсны быдтор

йылысь, бара сёйисны да висьтавлісны. Ану да Март тшөтш сёйисны, но ыджыд висьтъяс эз висьтавлыны. Кынөмъясыс кор налөн пөтісны, челядь ворсісны Сипсиккөд.

Медбөрти чужан луныс помасис, сэсся мам шуис, воис пө кад лөсьөдчыны гортө мунны. Но айыс чөвтіс:

— Виччысьлөй неуна, ме муна такси босьта!

— Босьт бара, — вочавидзис мамыс.

— Босьт, босьт! — горөдісны Ану да Март.

А Сипсик нинөм эз шу, сійө өд ньөтчыдысь на олөмас эз ветлы таксиөн да лючки эз төд, мый сійө сэтшөмыс.

Айыс пасьтасис да петіс такси корсьны, мукөдъяс тшөтш кутісны надзөникөн пасьтасьны да даннеасьны. А кор найө петісны, батыс сэки локтө нин вөлі таксиөн.

Ставөн пуксялісны, шопер заводитіс моторсө, вөрзис. Но таксометрыс уджалө нин вөлі. Тайө таксометрыс вөлі сэтшөм машинатор, коді петкөдліс, уна-ө гольгөмысь колө мынтыны. Быд километраысь коліс мынтыны кызь ур, а таксометр лыддис став километрсө да гижис ур лыдсө вевдорас. Ачыс сійө точөдчис дзик часі моз.

Такси гольгис зэв өдйө, панйис өти автобус да кык грузөвик. Тадзи найө регыд сувтісны асланыс керка водзын. Ану видзөдліс таксометр вылө да аддзис: выліас гижөма «көкъямысдас ур». Батыс мынтысис, найө петісны таксиысь, и таксиыс муніс.

Сэки Ану друг казяліс — Сипсикыс абу. Сійө кутіс ыджыд горөн бөрдны. Сипсик кольөма таксиө!

Коньөр Сипсик пукаліс таксиын бөръя пуклөс вылас да сідзжө көсйис бөрддзыны. Сөмын эз вермы: сылөн өд синваыс эз вөв.

— Öні жө сувтөй! — горөдіс сійө шоперыслы, но шопер эз кыв сійөс да сөмын водзө төвзис. Төдтөм керкаяс югнитісны боқыті, москиөд ветлісны төдтөм йөз, а Сипсик кыліс асьсө өтка да шыбитөм-эновтөм лолөн.

Сэсся коркө машинаыс сувтіс. Сипсик видзөдліс өшиньө да аддзис — найө воөмны светофор водзө. Сійө светофорыс өшаліс улич весьтын, сэні ломаліс гөрд би. Сэсся гөрд би пыдди кутіс ломавны виж, да сэсся турунвиж. Турунвиж би öзйигөн найө вөрзисны да вуджисны туйвежсө.

Сідз төвзисны найө бара төдтөм уличөд. Сэні друг Сипсик аддзис өти аньөс. Туй дорын сулаліг сійө эньлолыс лэптөма вөлі кисө вывлань. Такси öні кутіс нин надзмөдчыны, сэсся сувтіс аньыскөд орччөн. Сэки Сипсик казяліс: тайө эньлолыслөн аскөдыс вөлөма тшөтш ичөтик нывка.

Аныс восьтіс такси өдзөс да пырис нывкаыскөд.

— Кора, нуёй Пирн пурысь¹⁰ вылө, — шуис сійö шоперлы.

Нывка друг горөдіс:

— Мамөй, видзөд, кутшөм акань тані эм!

— Сійөс, тыдалө, кодкө вунөдөма, — чайтіс мамыс.

А нывка шуис:

— Ме тайө аканьсө аслым көсья!

Босьтіс сійö Сипсикөс киас да некымынысь бергөдіс-песовтіс. Öні нин Сипсик скөрмөмөн горөдіс:

— Кыдзи тэ верман көсйыны менө аслыд босьтны, менө өд вөчис Март да ме ачым Анулөн.

Нывка эз гөгөрво Сипсиклысь висьтсө, но шопер видзөдліс бөрлань да шуис:

— Тіянөдз тані мунісны өти зонка да ичилик нывка ай-мамыскөд. Тайө, вермас лоны, налөн аканьыс.

Но төдтөм нывка кутіс бөрдны и век горзіс:

— Ме көсья тайө аканьсө аслым, ме көсья сійөс аслым...

— Эн низгы! — гораа шуис нывкаыслы эньыс.

Сэки Сипсик ёна вежөктөмөн чөвтіс:

— Татшөм ыждались дорын некутшөм акань оз көсйы овны.

Нывка водзө век ыждаліс, но Сипсик эз сетчы. Та вөсна мамыс босьтіс сійөс нывкаыслысь да сетіс шоперыслы. Шоперыс пуксьөдіс сійөс ас весьтас. Сэсся найө регыд воисны Пирн пурысь вылө; сэні оліс сійө ыждались нывкаыс: мамыскөд сійө сэсся машинасьыс петіс.

Регыд кутшөмкө шляпаа айморт¹¹ пырис таксиө, сэсся найө вөрзисны шляпаа морт оланінлань. Аймортыс вөлөмкө олө Ану да Март керка матігөгөрын. Шоперыс гольгөдіс Ану да Март керкаөдз, босьтіс Сипсикөс моздорас да петіс таксиысь.

Улич весалысьыс вөлі пыранін дорас буретш куритчө, такси шоперыс юаліс сылысь:

— Кора висьтавны тіянөс, олө оз тані өти ичилик нывка, сылөн эм неуна ыджыдджык вок?

— Олө, — шуис улич весалысь. — Мөд судтаын, витөд номера патераын.

Такси шоперыс кайис мөд судтаө да триньөдіс Ану да Март өдзөсдорса триньганө. Кор батыс восьтіс өдзөссө, шоперыс сетіс Сипсикөс сы киө да шуис:

— Тіян ичөт нывныд тайө аканьсө таксиө вунөдөма.

— Ыджыд аттьө тіянлы,— шуис бать. — Миян Ану ёна шогалө дай өнөдз на бөрдө.

¹⁰ Пурысь — улича.

¹¹ Айморт — мужчина.

Ану збыльысь ёна-ёна шогалё вөлі да некыз эз вермы дугдыны бөрдөмысь. Сөмын Сипсикөс аддзём мысти ымзөмсьыс пырысьтөм-пыр дугдіс. Сійө топыда дзигөдіс Сипсикөс да шуис:

— Радейтана, радейтана Сипсик, ме некор да некытчө нин сэсся тэнө ог вунөд.

Сипсик тшөтш вөлі зэв рад. Кужис кө сійө бөрдны, сэки бөрдіс эськө шудысла.

Сипсиклөн Төлысьө кайлөм

Өти лунө айныс лыддис газетысь мамлы да пөрысь мамлы, кызди Асья кодзув вылө тювгач лэбзьөма. Март да Ану вөліны сэні да тшөтш кывзісны. Артмис сідзи, мый Асья кодзув (Венера) — сійө өти кодзув, а збыльысьсө пө сійө миян мусяр кодь жө ыджыд. Сөмын сійө сэтшөм ылын, мый миянөдз өдва дзирдалө да төдчө.

— Да, — шуис бать.— Регыд воас кад, кор йөз кутасны тювгачьясөн¹²(ракетаясөн) ентыколаө быд пельөсө лэбавны.

Сэсся батыс висьтавліс быдсяматорсө — век ентыкола йылысь, Асья кодзув, тювгачьяс да уна мукөдтор йылысь. Март да Ану лючкиасө висьтсьыс унатор эз гөгөрвоны да воисны асланыс вежөсө.

— Мыйөн ми талун ворсамө? — юалис Ану.

— Ворсам тювгачөн, — шуис Март.

— А кызди ми сійөн ворсам? — юалис Ану.

— Медводз вөчам тювгач, а сэсся кутас тыдавы, — шуис Март.

Найө босьтісны мамыслысь өти важ көмкот көрөб да ляскалісны гөгөрыс гөрд кабала.

— Но тайө тювгач пытсьяньыс өд нинөм оз тыдав, — шуис Ану.

— Колө өшинь вөчны, — содтіс Март.

Сэсся найө вундісны тювгач пытшкө өшинь да корисны мамыслысь неуна сэтшөм пырыстыдалана кабала, мыйөн тай варенньө банкаяс тупкавлөны. Сійө пырыстыдалана кабаласө найө ляскисны өшинь розьө, медым сынөдыс тювгачысь ортсыө эз пет. Айыс өд висьтавліс, ентыколаас сынөдыс пө абу да медым сэтчө мөдөдчыны, колө пө аскөдыд тшөтш сынөд босьтны — мөд ног лолавнытө он вермы.

— Но өні дась, — шуис Март.

— Мича, гөрд, — содтіс Ану.

¹² Тювгач – ракета

Друг кыліс вöсньыдик гөлöс:

— Ме көсья тайö тювгачөн ентыколаö лэбны.

Тайö горыс кыліс чачаяс тыра пельöссянь. Тайö вöлі Сипсик.

— Лэбзян Асья кодзув вылö? — юалис Март.

— Көть и Асья кодзув вылö! — вочавидзис Сипсик.

Сэк Ану горöдіс:

— Оз позь Асья кодзув вылö! Ме ог лэдз! — Ану дзик нин мөдіс бөрдны.

— Мый вöсна тэ он лэдз? — юалис Март.

— Асья кодзув öд сэтшөм ылын, — шуис Ану. — Тювгач лэбö сэтчö эзв дыр, а ме ог көсйы овны та дыра Сипсиктөг.

— Мед Сипсик лэбзьö, сідзкö, Тöлысьö, — мөвпыштис Март. — Тöлысьö сійö лэбзьылас гоз-мөд лунөн.

— Көсьян он тэ Тöлысьö лэбзьыны? — юалис Ану Сипсиклысь.

— Верма и Тöлысьö, — шуис Сипсик.

Сэки вöлі лун, Тöлысьыс енэжас эз вöv. Найö ставыс куимөн кольччисны рыт виччысьны. Медбöрын пуксис рыт, сöмын Тöлысь век на эз вöv. Сэки найö водісны узыны.

Войнас Март садьмис, медводдза аддзанторйыс вöлі Тöлысь. Тайö вöлі тыр Тöлысь, сійö öшинь пыр югдöдö вöлі керка пытшсö. Сэсся Март виркнитис шебрас улысь, матыстчис Ану вольпась дорö.

— Чеччы, — шуис Март Анулы. — Тöлысьыс енэжын.

Ану дзик пыр садьмис. Сэсся кыкөн öтвылысь найö садьмөдісны тшöтш Сипсикöс. Сы бöрын пуксьöдісны тювгачö да петісны гусьöникөн балкон вылö. Войыс вöлі ыркыд, а найö вöліны сöмын войся дөрөм кежысь. Но таысь эз шогсьыны.

— Миянлы быть колö сійöс бура öддзöдны, — шуис Март.

— Да, — вочавидзис Ану. И сы бöрын нöшта на содтіс: — Бур туй, муса Сипсик.

Март öддзöдчис да шыбитіс тювгачсö Тöлысьлань. Сы бöрын найö пырисны бөр водісны узыны.

Асывнас Март да Ану садьмисны, öдйөджык пасьтасисны да котöртісны садйö. Найö көсйисны видзöдлыны, воис эз нин Сипсик бөр Тöлысь вылысь. Да мый сёрнитны — воöма бөр! Сійö вöлі тювгачысь петöма нин да узьö кык дзоридз град костын.

— Коньөр Сипсик, — шуис Ану. — Ёна нин тэ пöди мудзин!

— Немся эг, — вочавидзис Сипсик. — Ме öд лэбзьылі тювгачөн.

— Висьтав, кутшөм сэні Тöлысь вылас олöмыс? — юалис Март.

— Сэні эмöсь нöрысьяс да логьяс, — шуис Сипсик. — Но пуяс ни дзоридзьяс, нинөм сэні оз быдмы. Сэні ваыс немся абу. Йöзыс сэні абу жö дай пемöсьяс важөн нин абуöсь.

— А збыль абу, мый сэні кокныд чечавны да котравны? — юалис Март.

— Да, збыль, — вочавидзис Сипсик. — Мортис сэні вермас эськө керка вевт вылөдз чеччыштны, вөлі кө сэні керкаыс. Ану да Март лоины ёна радось, өд өні найө төдмалисны, кутшөм олөмыс Төлысь вылын. Найө пыртисны Сипсикөс вежөсө, водтөдісны сійөс шойччынын ворсан вольпасьө.

Сипсик уялө саридзын

Пөсь гожөмыс пуксис. Ану да Март мамыскөд өтлаын тшөкыда ветлісны саридз дорө гожъявны да уявны. Ану эз на куж варччыны, но вадорсянь небылн уялө-мыссьө бура нин вөлі. Өд матыті уявны гожся саридзын сідзжө зэв лөсьыд. Өти шог сөмын вөлі: Сипсикөс эз вермыны аскөд босьтлыны саридз дорө. Сыкөд вөлі татшөм шог: шонді улын сійө гожъялөм пыдди еждаммытөдз быгавлывліс. А мыссьөм либө уялөм йылысь Сипсик өні эз нин и мөвпавлы.

Но өти шойччан лун асылө, Ану лөсьөдчө кор вөлі бара мунны вадорө, Сипсик корис аслас вөсньыдик гөлөснас:

— Босьтлы менө аскөдыд, көть сөмын өтчыдысь!

— Тэкөд саридз дорын вөчнысө нинөм, — шуис Ану.— Саридз дорын ворслывлөны ёнджыкасө резинаысь чачаясөн.

— Ме верма өд сумкаын пукавны, — шуис Сипсик.

— Сумкаын тэныд гажтөм лоө, — чайтіс Ану.

Та вылө Сипсик шуис:

— Тэ кө таысь полан, ме өд верма тэнад резина пыжъяд неуна плавъялыштны саридзті.

Өні нин Ану кутіс мөвпавны, медбөрын сэсся шуис:

— Мед лоас тадз. Сөмын видзөд, резина пыжтө төдлытөгыд эн какунт.

Сідз тайөс ставсө вөлі артмөдөма. Туй водзвылын Сипсик пырис вадорө ветлан сумкаө, кык газва¹³ сулея костө. Сійө сэні пукаліс лөня, вөрззытөг, кутіс газва сулеяяссө, мед найө эз голякывны. Акань ньөтчыдысь скөра эз горөдлы, көть сылы и вөлі ёнакодь дзескыд. Сөмын саридз дорын медводдзаысь видзөдліс Сипсик сумкасыс ортсыө. Сійө аддзис саридзсө да шемөсмис:

— А саридзыс кутшөм ыджыд!

¹³ Газва — лимонад.

— А тэ ичот, — шуис Ану. — Та та вöсна тэныд колö кутчысьны вадорсяньыс матын, кутан плавъявны кор резина пыж вылын.

Мамыс да батыс нюжодчисны вадор лыа вылö гожйодчыны. Мартлы эз кажитчы öтилаын гожъялöмыс. Сійö муніс видзöдлыны, оз-ö позь тöдмасьны кутшöмкö ас кодь жö зонкакöд, медым öтвылысь мыйöнкö, налы кажитчанаөн, ноксьыны.

Ану видліс васö кок чуньнас.

— Ваыс талун кöдзыд, — шуис сійö Сипсиклы. — Тайö сы понда, мый тöлыс пöльтö вадорсяньыс.

— Сідзкö, зэв бур öні саридзті плавъявны, öд тöлыс йöткö мышсянь, — мөвпаліс Сипсик.

— Тэныд гажтöм нин лои? — юаліс Ану.

— Вермас лоны, да, — шуис Сипсик. — Пöльт ассьыд резина пыжтö.

Ану пöльтіс резина пыж, пуксьöдіс Сипсикöс пыжйö да йöткыштіс ваö.

— Ме кöсья сэтчö яхтаяс дорö кывтлыны, — фантазируйтöмөн шуис Сипсик. Ану тшöтш кутіс видзöдны яхтаяслөн еджыд тöвдöра¹⁴ вылö.

— Йöюк, — серöктіс сійö. — Яхтаясыс öд зэв ылынöсь. Но Сипсик чорыда шуис:

— Ме кыла саридзлысь кыскöмсö. Мем быть колö кывтны!

Сэки Ану казяліс, мый Сипсик вöлі вадорсяньыс кывтöма ылö нин да лöсьöдöма пыжсö веськыда паськыд саридзö.

— Öні жö бергöдчы! — повзьöмөн горöдіс Ану.

— Ме эськö и бергöдча, — горöдіс Сипсик. — Но саридзлөн кыскöмыс вывті ён. Ме некыз ог вермы сылы паныд мунны.

Сійö кывтіс вадорсянь век ылöджык и ылöджык, вадорсянь тöлыс йöткис сійöс водзö.

Анулы нинöм мөдтор эз коль вöчны Сипсик бöрся вöтчöмысь кындзи. Саридзлысь кыскöмсö сійö эськö эз нин кыв сэтшöм ёна, öд мыйөн ылöджык сійö пырис, ваыс лоис век ыркыдджык. Сійö быттьökö эз лэдз Ануöс, мед сійö эз кый Сипсикöс.

— Аддзысьлытöдз, — горöдіс Сипсик. — Видзöд, эн вунöд менö сэккості!

Ану öні чорыда повзис. Сылы воис юрас, гашкö, Сипсик йöй юрнас нöшта кывтас кытчökö мудор¹⁵ сайö.

Сэсея Ану койсис ваөн да муныштіс сулökö¹⁶ гартовтчöмөн, медым ваыс эз кажитчы сэтшöм кöдзыдөн, медым Сипсикöс бурджыка бөр

¹⁴ *Төвдөра* — парус.

¹⁵ *Мудор* — граница.

¹⁶ *Сулök* — кичышкöд

вайодны. Сідзи восьлаліс сійо гырысь воськовьясөн водзё. Ваыс воис сылы морөсөдзыс нин, сэсся пельпомөдзыс да регыд тшөка лыөдзыс. Сійо воис нин дзик Сипсик дорөдз да нюжөдіс кисө кыйны резина пыжсө. Но буретш медбөръя здукас төвнырыс йөткыштис пыжсө бара на ылөджык, да Сипсик кывтіс веськыда Ану ныр улысь.

Водзё Ану пырнысө эз лысьт, сэсся өд ваыс сійөс эськө юрвывтис.

— Тэ омөлик да кывзысьтөм Сипсик! — горөдіс сійо шогпырысь.

А Сипсик дзик нинөм эз кывзы, сөмын ачыс водзё кывтіс сэтшөм чужөмөн, быттьө көсйис Анулы кузь ныр петкөдлыны — нерны сійөс.

А сэсся лоис татшөмтор...

Ану эз и гөгөрволы, кызди кокъясыс саридз пыдөссянь кайисны вывлань да дзик быттьө асьныс кутисны вөрны, вывсянь увлань, вывсянь увлань, вывсянь увлань. Сэк жө асьныс кутисны вөрны тшөтш киясыс. Вадорсянь кыліс Мартлөн гора гөлөс:

— Видзөдлөй, видзөдлөй! Ану варччө!

Мам-бать тшөтш видзөдлісны саридзлань да адзисны, кызди Ану збыльысь варччис. Кор Ану гөгөрвоис асьыс варччөмсө, Сипсик водзё сыысь эз нин мын. Ану регыд сійөс вөтөдіс да вайөдіс сійөс тадзикөн бөр, резина пыжсө ас водзас йөткалөмөн.

— Но? — юаліс Сипсиклысь, кор найө петісны.— Мый медводзын тэныд колө вөчны?

— Прөшша кора, — шуис Сипсик. — Ме өд эг көсйы сэтшөм омөльөн лоны, саридзлөн кыскөмыс тай сөмын збыль вөлөма ёнысь-ён.

И чуймөдантор — друг Ану тшөтш кыліс саридзлысь кыскөмсө. Сійөс веськыда кыскөмөн-кыкис ваө. Нывка бара пырис саридзө да кутіс варччыны.

Вадорын Сипсик видзөдіс уялөм вылө да горзіс:

— Эн кывт ёна пыдынінас.

Татшөм ногөн помасис Сипсиклөн саридз дорө ветлөмыс.

Сипсик керка вевт вылын

Айыс ньөбис уна рөмөн петкөдлан серпаскуд. Таысь, дерт, быдөнлы лои нимкодь. Кор телевизорсө сувтөдісны вежөс пельөсө, айыс кайис орччөн олысьыскөд керка вевт вылө гыкутан сувтөдны. Мартөс лэдзисны вевт вывсянь видзөдны. Март медбөрти лэччис сэтысь бөр, пырис вежөсө да Анулы шуис:

— Тэ он и тőd, кутшōм лōсьыд керка вевт вывсянь видзōдны увлань. Став карыс дзик ки пыдōсын кодь.

— Абу ōмōй ōткодь, — вочавидзис Ану. — Ме бурджык видзōда уна рōмōн петкōдлан серпаскуд да сэтывь аддза сідзи жō ки пыдōс вылысь моз мусярвывса быдсяма кар.

— Сійō абу ōткодь, — висьталіс Март. — Серпаскудйын ōд сōмын серпас, а вевт вывсянь карыс збыльысь тыдалō.

Ану сōмын вōрзōдыштіс пельпомьяснас.

— Кыз кōть эн ошкы, керка вевт вылō ме ог кай, — шуис сійō. — Сэні вермасны зонкаяс шōйтны, ёна кō налы окота лоас. Тадзи налōн сёрниыс помасис, олōмыс сэссия водзō ас ногыс муніс.

Ану тшōкыда видзōдлывліс уна рōма серпаскудысь челядылы уджтасьяс да босьтліс корсюрō тшōтш видзōдны аскōдыс Сипсикōс. Сипсиклы медьёна воины сьōлōм вылас мультфильмьяс, торйōн нин сэтшōмьяс, геройясыс кōні вōліны аканьяс. Но ōти лунō, Ану да Сипсик кор видзōдōны вōлі труба весалысьяс йылысь мультфильм, Сипсик ышловзьōмōн шуис:

— Тайō век жō абу збыльтор. Серпаскудйын ōд сōмын серпас.

— А мый нō тэ кōсьян? — чуймис Ану.

— Ме кōсья керка вевт вылō кайлыны этайō труба весалысьыс моз, — шуис Сипсик. — Ме кōсья збыльысь кайлыны, ог кōсьы сōмын серпаскудйысь мыйкō видзōдны.

— Керка вевт вывсянь позьō усыны, — шуис Ану.

Но Сипсик эз энотчы аслас кōсьōмысь.

— А кызди нō труба весалысьыс эз усь? — юаліс сійō.

— Труба весалысьяс велōдчōмаōсь сэті ветлыны, — вочавидзис Ану. — Да бара тайō ставыс сōмын кино, сійō труба весалысьыс ōд сōмын акань.

— Ме ōд тшōтш акань, — шуис Сипсик.

Тайō, дерт, вōлі збыль.

— Ме сōмын акань, — выльысь шуис Сипсик. — И керка вевт вылō ме пырысь-пыр жō кая.

Ōні Ану гōгөрвоис, мый сылы оз артмы кутны Сипсикōс, сійō ōд ёна вōлі кōсьйō кайны. Ану сōмын ышловзис да шуис:

— Ме ог вермы тэнō лэдзны сэтчō ōтнадтō.

Сідзи найō мōдōдчисны кыкōн. Медводз найō гусьōникōн кайисны лōскō да лоины зэв радōсь, мый лōс ōдзōс эз вōв игана. Ставыс налōн артмис лючкиысь лючки, ōд лōс ōшиньсō тшōтш кольōмаōсь восьсōн. Кайисны найō сера пос кузя да кыкнанныс чургōдісны юрьяснысō ōшиньō.

— Ой, кутшōм ылōдз тасянь тыдалō! — чуймōмōн горōдіс Ану.

— Збыль ōд, — нимкодясис Сипсик. — Сёрни абу, дзик мōд нога, оз серпаскудйын моз.

Найö аддзисны уна-уна керка, машина да йöзöс, став карыс вылісянныс видзöдiгөн вöлі збыльысь ыджыд гаж дыръя кодь.

— Öнi ветлöдлыштам неуна вевт вывтi, — сетiс мöвп Сипсик. Но Ану чорыда шуис:

— Водзö ылöджык ме ог мун.

— Лэдз менö, ме сöмын кык воськов вöча, — кевмысис Сипсик. — А тэныд оз ков ылöджык мунны, тэ сöмын менсьым киöс кут.

Талун Сипсик збыльысь вöлі зэв асныра.

— Но сöмын тадзи, ме тэнсьыд китö кута... — сетчис Ану. — Татшöм ногөн тэ верман кык воськов вöчны. Сiйö лэптiс Сипсикöс вевт вылö, и Сипсик, Ану киö кутчысьöмөн, нимкодя тапъяліс көрт вевт кузя.

— Нöшта öти воськов, öти воськов, — лöвтiс Сипсик.

Но Анулөн кыис эз нин судз, ылöджыксö сiйö эз нин нюжав.

— Нöшта öти ичöтик воськовтор! — тапъяліс Сипсик.

Анулөн мыйкö вочавидзтöдзыс Сипсик вöчис сiйö ичöтик воськовсö. Сiйö жö здукас сiйö мыніс Ану кыись да друг кутiс гöгыльтчыны вевт кузя увлань.

— Кутчысь! — повзьöмөн горöдiс Ану.

Сипсик гöгыльтчис дзик вевт дорышöдз да чуймис, кызди сiйö друг татөн лои. Казяліс — сiйö быд здукö вермас усьны вевт вывсянь. Сэсся Сипсик видзöдліс увлань да горöдiс Анулы:

— Март воöма школаысь! И мукöд челядьыс горт гöгöрынöсь жö!

Ану гöгөрвоис нин, мый öтнас сiйö оз вермы Сипсикöс мездыны. Ану перыда лэчис пос кузя увлань да тэрмасьöмөн петiс ывлаö, көнi Март мукöд челядькöд ворсiс.

— Муса ыджыд вокöй, — шыасис Ану Март дорö. — Лэдз Сипсикöс керка вевтысь!

— О-о-о! — шемöсмис Март, видзöдліс вывлань и казяліс Сипсикöс вевт вылысь. — Кызди сiйö сэтчö веськаліс?

— Прöстö босьтiс дай кайис, — вочавидзис Ану.

Та вылö Март мый вöсна кө серöктiс да юалiс:

— Тэ сiйöс киад эн и босьтлы?

Мукöд челядьыс тшötш сералiсны да видзöдiсны Сипсик вылö, сiйö тыдалiс вевт дорышын. Но Ану сöмын шуис:

— Сипсик талун вывтi асныра.

Март кутшöмкö здук мöвпалыштiс да сэсся шуис Анулы

— Вай татчö гöгрöс пызан вылысь еджыд пызандöрасö.

— Мый вылö миянлы пызандöраыс ковмас? — юалiс Ану.

— Сипсиклы колö ёна зэлöдöм пызандöра вылö чеччыштны, медым эз доймы, — гöгөрвоöдiс Март. — Би кусöдысьяс татшöм ногөн сотчысь керкаö кольöм йöзöс мездöны.

Ану өдийö котөртлис керкаө да локтис пызандөраөн бөр. А Март босьтис кузь көлуй потш — сийө кутө көлуй өшлан көвсө усьөмысь — да кайис сийөн вевт вылө.

Ануысь кындзи сэни нөшта вөли куим зонка, быдөн босьтис кияс пызандөра пельөсөн. Найө мунисны вевт дорыш улө, сэтчө, кытчө Сипсиклы вөли колө усьны, да ёна зэлөдисны пызандөрасө.

— Дасьөсь абу? — горөдис Март вевт вывсянь.

— Дасьөсь! — воча горөдисны челядь увсяньыс.

И сэки Сипсик чеччыштіс.

Сынөдын бергаліг, киясөн шенасиг сийө усис увлань да медбөрын лючки-ладнө веськаліс веськыда пызандөра шөрө. Тані сийө кыкысь молодец моз чеччыштіс да колис лөня куйлыны пызандөра вылын.

— Ура! — горөдисны челядь.

Но Ану шуис Сипсиклы.

— Тэ зэв асныра да кывзысьтөм, та понда ме сувтөда тэнө пельөсө.

Сийө нуис Сипсикөс вежөсө да кайис нин пельөсө сувтөдны. Сэссия мөдарө думыштіс да нуис Сипсикөс стөч сийө чачаяс видзан аслас пельөсө, көні Сипсик велалөма нин вөлөм овнысө.

Сипсик тшак вотө

Четвергө зэрис, пекничаө зэрис, субөтаө бара зэрис. А вежалунө кобис, да мам шуис:

— Ветлыны кө эськө өні тшакла.

Ану да Март дзик пыр лоины та дор. Айыс тшөтш шуис, колө пө асьнымөс неуна пальөдыштны. Сөмын пөрысь мам колис гортө пусыны, тшак вотігөн, вөрын ветлігөн өд кынөмыд пыр ёна сюмалө.

Медся лөсьыд, дерт, Анулы вөлі. Сийө вежөрын тшак вотөмыс вөлі дзик ворсөм кодь, тшакъясыс ставныс зэв мудера дзебсясьоны да, коді нитшкө, коді тусяпу костө либө увдор увьяс вуджөрө.

— Мамө, — шыасис Ану. — Ме верма ог босьтны аскөд Сипсикөс? Сипсик некор на эз ветлы тшак вотны, сийө ньөтчыд на эз вөвлы вөрын да оз төд мый сийө сэтшөмыс.

— А друг вошас, — думыштчис мамыс.

Ану шуис, кыдзи нө пө сийө вошас, найө өд Сипсиккөд став кадсө кутасны киө кутчысьөмөн ветлыны. Нөшта содтіс, эз на пө вөвлы сылөн өнөдз некутшөм шыбиль сэкия кындзи, кор тай сийө Сипсикөс таксиын вунөдліс.

Медбөрын мам лэдзис.

Сэсса найö мунісны. Мамыслөн да айыслөн вöлі тшак вылö торъя көрзина, Мартлөн вöлі пластмассаысь еджыд ватлан (ведра), а Анулөн гөрд ватлан. Сипсиклөн нинөм эз вöv, сійö пукаліс Анулөн гөрд ведраын да радпырысь діръяліс бөрö-водзö. Сипсиккөд вöлі сэтшöм ногөн сёрничтöма, мый сійö ассъыс аддзöм тшаксö пунктö Ануөн аддзöмаяскöд öтлаö. Сипсик эз вöv талы паныд, öд ачыс сійö вöлі Анулөн да сыөн аддзöм тшакъясыс вöліны тшöтш быттьö Анулөн.

Карысь найö мөдöдчисны автобусөн. Эз на найö мунны ылöдз, кутіс нин тыдавны вөр. Тайö вöлі ыджыд вөр, сэні быть эм уна тшак. Сэсса вөр шöрын öти сувтланінö автобусыс сувтіс, да найö петісны.

— Видзöдöй, медым ті мян кытчökö энö вошö, — шуис мамыс ягö пыриганыс нин. — Вöрын позьö кокниа вошны.

— Сэки ме шутёвта, — висьталіс Март.

— А ме горöда уу-уу, — шуис Ану.

А Сипсик нинөм эз шу. Сылөн вомыс нюжаліс пельöдзыс кузь визь моз, а татшöм вомөн öд некыз он вермы шутёвтны. Дай гөлöсыс сылөн вöлі сэтшöм вöсньыдик, мый колö вöлі кужны на сійöс кывны. Та вöсна Ану корис, мед Сипсик сыысь весиг öти вöськов вылö эз кольччы, мед көть и аддзас сійö шензьöданаторъяс. Мамыс сетіс Анулы ичöтик пурт да шуис:

— Тшаксö пыр колö пуртөн вундыны. Кинад нетшкигөн тшак вужъясыс нитш пытшкас вермасны доймыны да сэк сэсса локтан вöт тшакыс оз пет.

— Кывлін? — шуис Ану Сипсиклы. — Тшаксö колö пуртөн вундыны. Сипсик, дерт, кывліс, да гөгөрвоана довкнитіс юрнас.

Вöрын вöлі вывті мича. Пув гөрдаліс, дзизгисны кельыдгөрд тусяпуяс костын мазіяс, джуджыд пожöм йывъяс вöрышталісны төв вылын. И регыд Ану збыльысь аддзис тшак. Сылөн гөгрöс гөрд юрыс ылысянь нин усис синмас. Ану копыртчис тшакла, пуксьöдіс Сипсикöс нитш вылö да видзчысьöмөн вундіс тшак подсö.

— Тайö уртшак, — шуис сійö Сипсиклы. — И ставнас лючки — некыті абу лельöссьöма.

Сійö пунктіс гөрд уртшаксö гөрд ведраас, босьтіс Сипсикöс киас да водзö муніс пыдöджык вөрö. Регыд сійö аддзис нöшта кык виж уртшак да некымын рuchtшак¹⁷.

— Видзöd, видзöd! — друг кутіс горзыны Сипсик. — Видзöd, кутшöм мича тшак! Ыджыд гөрд шляпаа! А сы вылын еджыд чутъяс!

— Сідз эськö да, — шуис Ану. — Тайö öд абу сёяна, а лёк гут кулан тшак.

¹⁷ Рuchtшак — лисичка.

— Абу сёян? — шензис Сипсик.

— Да, — шуис Ану. — Мукөд тшакыс пагөдны вермө, та вöсна тшакъяссө колө тöдны. Гут кулан тайö тшаксө сёйысьыс вермас весиг кувны.

Сипсик збыльысь повзис да думыштис, мый сийö öд некор на тшаксө эз сёйлы. Сийö сөмын полис Ану вöсна.

— Эн пов нинөм абусьыс, — лөньюдис Ану Сипсикöс. — Ми вотам сөмын бура тöдана сёян тшакъяс.

Öни нин сийö казялис ичөтик мичаник яг аньпельясöс (рыжикъясöс), öта-мöдыскөд орччөн найö тёпвидзисны турунвиж кизьяс моз. Ану лэдзис Сипсикöс му вылө да кутис вотны яг рыжикъяссө ведраö, пуртөн вундалөмөн, медым оз доймыны тшак вужъясыс.

Пуртсö сийö тшак местаö сатшкывлис — яг рыжикъяслөн подъясыс эз тыдавны. Съökыдпырысь вотис öтилаясь. Сэк неуна ылынджык тыдовтчисны нин выль пемыдгöрд яг аньпельяс. Ану сөмын вотчис. Весъкөдлас мышсö да водзö чукöртö. Став мукөдторйыс öти здукөн вешйис юрсьыс, сөмын син водзас сулалисны яг рыжикъяс. Ану найöс эз лыдды, но артыштис ылöсас, мый сё кымыныс регид стöч чукöрмас. Сё яг рыжик, тайö вöли нин урожай. Но сэсся яг аньпельяс бырины. Ану видзöдлис гөгөр.

Сипсик! Кытчö сэккості Сипсик вошис? Сипсик эз вöv. Некөн эз вöv. Анулөн друг сёлөмыс кутис ёна тiпкыны-висьны. Кыдзи нö сийö сэтчöдз вермис воны, Сипсикöс öтнасöс öд съöd вөр шөрö колис, тшак вотигмоз Сипсик йылысь дзикöдз вунöдис! Ану шогсис век ёнджыка и ёнджыка, медбöрын немтор эз аддзы бурджыкöс — бöрддзис. Сийö гөгралис да корсьысис, но Сипсикöс эз аддзы, бöрдөм шыыс сылөн лои гораджык и гораджык. Но тайö вöли буртор, сы вöсна мый медбöрын бöрдан шыыс воис Сипсик пельöдз.

Сипсик эз вермы кывзыны Анулысь бöрдөмсö, тайö сийöс ёна нормöдис. Та понда чукöртис Сипсик став асьыс вынсö да горöдис сэтшөм гораа, кыдзи вермис:

— Уу-уу! Ме öд тані! Ме тані, яг аньпельяс петавлөминын!

Ану сэк кылис Сипсиклысь гөлөссö, аддзис сийöс стöч сэтысь, кытысь найö аддзылисны яг рыжикъяссö. Сийö котөрөн воис Сипсик дорö да шуис:

— Зэв бур, мый ме тэнö аддзи.

— А меным тайö каднас öти тшак сюри, — шуис Сипсик.

И сөмын öни аддзис Ану ыджыд, зумыд еджыд гоб. Сийö быдмис веськыда Сипсик ныр улын.

— Ой, — шуис Ану. — Тайö öд дона гоб. Тайö медбур тшак.

Сійö видзчысьöмөн вундiс еджыд гоб подсö да аддзис, мый Сипсикөн аддзöм дона гобыс немся абу лёльöзьяма. Сэсся сійö пунктiс дона тшаксö асласкöд орччөн гöрд ватланас, таdzi öд налөн водзяньыс вöли сёрнитчöма.

— Уу-уу! — друг кысянькö зэв ылісянь кыліс мам гөлöс. — Ану-уу...

— Уу-уу! — горöдiс Ану воча.

Сійö котöртiс мам гөлöслань, öти киас Сипсик, мöд киас гöрд ватлан. Сэни вöлины уртшакьяс, ручшакьяс да яг аньпельяс, а сiдзжö Сипсикөн аддзöм зумыд еджыд гоб.

Сипсик — спортморт¹⁸

Бöрья кадö поводдяыс вöли ёна бур, Март зонкаяскöд быд лун сярийөн (мачөн) ворсiс. Ачыс сійö висьтавлiс, спортыс пö — сійö зэв колантор, донöдö мортöс да ёнмöдö дзоньвидзалун.

Та вöсна Ану чайтiс, мый Сипсиклы быть колö тшöтш асьсö донöдны¹⁹ да спортö босьтчыны.

Öти лунö Ану Сипсиккöд öтвылысь петiсны ывлаö. Кыкнанныс дыр видзöдiсны зонкаяслысь пудболасьöмсö. Сипсик чайтiс, мый сыысь коксярөн²⁰ (пудболөн) бур ворсысьыд öдвакö петас, сы серти öд мачыс вöли ёна ыджыдджык да вывтi öдийö гöглясьö-лэбалö вöли.

Сэсся Ану Сипсиккöд мунiсны орччөн олысь Мае керка дорö, Маеыс öд вöли Анулөн нывьёрт да найö тшöкыда öтлаын чеччавлісны, вузасянинөн да мукöд быдсяма ворсöмнас ворслiсны.

Мае котöртiс Анулы паныд да ылісянь на горöдiс:

— Тöдан он, миянлысь бассейнöс öд ваён тыртiсны!

Орчча, Маелөн керка дорас вöли нейджыд уяланiн, но сэни векджык ваыс эз вöв. Бöрья кадö васö вöли лэдзöмаöсь!

— Тайö зэв бур, — шуис Ану. — Купайтчам!

Мае сэки висьталiс, мыйсылөн мамыс эз тшöкты ваö пырны — ваыс кöдзыд на.

Ану чуньнас видліс васö да казяліс: ваыс абу нин сыктöдз кöдзыд. Сöмын Маелөн мамыс кö эз тшöкты, то, дерт, эз вермыны найö уявны.

Сэки друг Сипсик вашнитiс Анулы пеляс:

¹⁸ Спортморт — спортсмен.

¹⁹ Донöдны — закалять.

²⁰ Коксяр — пудбол

— Лэдз ме пыра!

— Збыль, — шуис Ану, — Мед Сипсик пыралас! Уялём — колана спортсикас да бурджыка ёнмөдө коксяръяс дорысь!

— Но сійө вермас вöйны! — шогсис Мае. — Тані ваис сійөс юрвывтө, да ми огө төдө, кужө оз сійө варччыны.

— Миянлы быть ковмас мездан кытш²¹, — мөвпыштіс Ану.

Мае котөртіс керкаас да ваис мездан кытш — тайө вөлі резинаысь нейджыд гөгыль сяма, кодөн тай шыбласьлөны, кодөс кутавлөны вадорын. Сійө ваис тшөтш көв, да найө йитісны көвсө мездан гөгыль дорө.

Сэсся лэдзис Ану Сипсикөс ваө. Сипсик лючкиа кутчысис ва веркөсө да эз и көсйы вöйны.

— Да сійө зэв бур уялысь, — шуис Ану. — Сөмын бура уялысья татшөм ногөн куйлөны ва вылын, оз вөрөдны кокөн ни киөн.

— Сійө эськө вермис на водзө неуна варччыштны, — втсьталіс Мае.

— Виччысьлы, — вочавидзис Ану. — Сылы колө на ва дорас велавны.

— Мунам сэккості тусь сөйыштам, — шуис Мае. — А сы бөрын бөр локтам да видзөдлам, кызди сійө уялө.

Анулөн сьөлөмыс эськө майшасис Сипсик понда, но сійө век жө муніс Маекөд тусь сөйны. Найө сөйыштісны гөрд сэтөр да неуна еджыд сэтөр, төкөтө крыжовник и. Сэсся сөйыштісны найө сьөд сэтөр да воисны бөр уяланін дорө видзөдлыны, велаліс эз нин Сипсик ва дорө.

Но вот шог лои! Сипсик вөлі пыдөсас нин куйлө!

— Мездан кытш! — горөдіс Ану.

— Ме пола — сійө вөис нин, — шуис Мае. — Тэ видзөд — сійө некызди нин оз вөр!

— Оз позь лачанымөс воштыны! — горөдіс Ану. Сійө кватитіс Мае кийсь мездан кытшсө да чеччыштіс ваө.

Ваис вөлі Анулы пидзөссяныыс вылөджык да көтөдіс платтьө дорышсө. Но Ануөс тайө эз повзьөд. Сійө пыртөдіс Сипсикөс мездан гөгыльө да горөдіс Маелы:

— Кыскы!

Мае кыскис көвсө да лэптис Сипсикөс вадорө. Но Сипсик куйліс турун вылын век на вөрзыывтөг.

— Колө вөчны мырдөн лолөдөм²², — шуис Ану.

Некодыс наысь сөмын эз төд, кызди сійөс вөчны. Мае сэсся котөртіс керкаас мамыслысь юавны, кутшөм ногөн вөчны мырдөна лолөдөм, а Ану кольччис Сипсикөс видзны.

²¹ Мездан кытш — спасательный круг.

²² Мырдөн лолөдөм — искусственное дыхание.

Друг Ану кыліс, кызди Сипсик зэв лөня да шогпырысь шуис:

— Ме зэв ёна котаси!

— Коньөрөй тэ! — горөдіс Ану. — Тэ өд вермин збыльысь вöйны!

— Ме төда, — шуис Сипсик. — Но тэ өд менө мездін!

— Ме вөлі төждысьтөм нывка, муні тусь сөйны, — шуис Ану. — Меным колө вөлі тэ дорын овны, тэнө видзны.

Мае воис бөр, но мырдөна лолалөм найө эз нин вөчны, Сипсик асьсө кыліс лючкиа нин да.

Сы пыдди Мае босьтіс кабалатор, карандаш да гижис сійөн бумага былө, сійө өд кужис нин гижны: «Төдтөминын ваө эн пыр!»

Тайө кабаласө найө лөсьөдісны палич помө да сатшкисны муө уяланін дорө. Татшөм ногөн найө лөсьөдісны гижөд, медым некод сэсса татчө эз вөй.

Анулөн гортас воигөн пөрысь мамыс буретш өшлө вөлі косьтыны көлуй, а Март сеталө сылы көлуйсө пельсаысь. Ану петкөдліс налы асьыс котасьөм Сипсиксө да юалис, кызди эськө Сипсикөс косьтыны, Сипсик вөлі өд брөд ва.

Пөрысь мамыс дивитанаа доккнитіс юрнас, но век жө босьтіс Сипсикөс да йитіс-крепитіс сылысь кияссө көлуй топөданьясөн көвьяс. Тадзи Сипсик өшаліс көв вылын Мартлөн гачкөд орччөн. Пөльтіс төв, Сипсик өтарө-мөдарө троньяліс көв вылын.

— Огоо! — чуймис Март. — Сипсик вөлөма зэв бур гимнаст! Видзөдөй, кутшөм топыда сійө кутчысьө!

Март нөшта на тойыштіс Сипсикөс, медым сылөн кокьясыс водзө на качисны-лыбисны да сынөдын вөчисны дзонь пертас²³.

— Тайө вөлі ыджыд качөдчөм, — шуис Март. — Тайөс зэв сьөкыд вөчнысө.

Ану видзөдіс Сипсиклысь көв помын троньялөмсө, таысь вөлі сыөн зэв дөвөль: көть купайтчынысө акань эз вермы, лои зэв кужысь гимнаст.

Сипсик тышкасьө чушканьяскөд

Ану садйын быдмис кык слива пу, кыкнанас сливаыс вөлі тыр. Чуймөдана вөлі видзөдны, кызди надзөникөн сливаяслөн рөмыс вежсьө. Пырджык өд найө лөзысь да вижысь вуджөны турунвижө, сөмын сливаяс вежсисны дзик мөд ног — медводз найө ставныс вөліны турунвижөсь, а бөрас өти пуын вижөдісны, мөд пуын лөзөдісны.

²³ Пертас — фигура.

Сливаяс лючки кисьмасны да сэки найö точ-точ усялöны муö. Ану босьтис öти мича лунö кöрзина киас кöрзина, Сипсикöс моздорö да петис сацийö усялöм сливаяс вотны. Сийö пуксьöдис Сипсикöс виж слива пу улö да шуис:

— Тэ сюся видзöд, сливаясыс кытчö усяласны. Сэсся сэки найöс турун пиысь кокниджык корсьны.

Сипсик дзик пыр кутис сюся видзöдны, Ану сэккості тэчаліс сливаяссö аслас нейджыд кöрзинаö.

Сливаяс чукöртöм вöлі збыльысь кокни удж. Сöмын колö вöлі видзчысьны чушканъясысь, найöс ёна кыскис сливаяс дорö да. Найö дзизгисны потласьöм сливаяс пöвстын да визъялісны лючки сливаяс вывті, öтторья нёнялісны чöскыд сливаысь васö.

— Чушканъясысь оз ков вывті ёна повны, — шуис Ану Сипсиклы збоймöдыштан могысь. — Тэ кö кинад он шенась, найö оз дöзмыны, оз и чушкыны.

— А ме ог и пов чушкöмысь, — вочавидзис Сипсик. — Ме öд ачым емön вурöмтор, чушкöмыс нинöм омöльсö меным оз вöч, ме öд ставнас ватаысь.

Век жö сийö пукаліс зэв лöня öтилаян да эз и шеныштлы кинас. Сэки пу вывсянь усис слива — ыджыд, кисьмöм, сök тыра. Сийö сöмын эз усь турун пöвстö, а веськыда Сипсиклы юр вылас: тотш!

— Ай, — шуис Сипсик, — повзи весиг.

Омöльторйыс вöлі со мый — усигас сливаыс потіс да лякөсьтис Сипсикöс сökнас.

— Коньöр Сипсик! — горöдис Ану. — Öні жö мунам тайö слива пу улысь!

— Оз ков, — паныд вöлі Сипсик. — Кык слива öти да сийö жö инö оз усь. Тайö сливаяс усялан оланпас²⁴. Кытчö öти слива öтчыд усьліс, сэтчö мöд оз нин усь.

Но Ану эз кывзы Сипсикöс. Сийö босьтис аканьсö киас да муніс лöz сливаяс чукöртны, сы вöсна мый вижъясысь ставыс нин вöліны кöрзинаас. Öні нин пуксьöдис сийö Сипсикöс слива пусянь неуна ылöджык, медым водзö татшöмторйыс эз ло.

Регыд и лöz сливаяссö пу улысь лои вотöма, сöмын кöрзинаö тöрис эськö вель уна на.

— Пусö колö шатлöдлыштны, — шуис Сипсик. — Сэки кисьмöм сливаяс усяласны, а кисьмытöмъясыс колясны пуас.

²⁴ Оланпас — закон.

Сипсик, дерт, вөлі прав, и Ану кутіс пусө шатлөдлыны. Сійө шатлөдліс өні нин став вынсьыс, мед эськө унджык слива усис да көрзинаыс өдйөджыкөн тырис.

Но өні артмис нин дзик мөдарө.

Чушканъяс! Слива пу вылысь качис вогъяслөн²⁵ сэтшөм ыджыд кельөб, мый Ану синьяс водзын ставыс лои уна визя, стөчджыка кө, виж да съөд визя серпас. Виж да съөд визя чушканзіяс дзизьялісны гораа джужгөмөн Ану да Сипсик гөгөр. Ану ачыс эз гөгөрво, кыдзи кутіс кияснас шенасьны. Та вөсна чушканъяс нөшта на ёнджыка скөрмисны.

Сэки Сипсик горөдіс Анулы:

— Пышйы! Пышйы татысь!

Тайө медбөрья здукас Ану копыртчис Сипсик весьтө медым босьтны сійөс аскөдыс. Но сэк жө тракнитіс кисө бөр — Сипсиклөн сунис юрсиысь сы вылө лёка сераліс скөр да вельмөм чушкан, сійө пукаліс төнъя сливалөн стөч усянінас.

— Öдйөджык! — горөдіс Сипсик. — Пышйы! Ме ас дорам найөс дырджык кута!

Дзик пыр Ану котөртіс Сипсиктөг кильчө пом вылө сувттөдз. Татчө сы бөрся чушканъяс эз нин лэбзыны, позис өдйө котөртөмысь ловсө неуна веськөдыштны. Ану бергөдчис да видзөдліс Сипсиклань.

Ичилик повтөм Сипсик... Сійө вөрзывтөг сулаліс аслас местаас. Сійө ни өти воськов эз бөрынтычы, сійө тышкасис. Сійө кутіс ас дінас чушканъясөс, кыдзи вөлі көсйысьөма. Найө повзөдчөмөн кытшлалісны сы гөгөр, налөн тышкасян зыкыс кыліс весиг кильчө помөдз. Но Сипсик эз и лөсьөдчы пышйыны тышкасянінысь.

Друг Анулы лои яндзим ас вөснаыс. Оз, некор оз! Сійө оз вермы кольны Сипсикөс тайө слива сөк юысь гусясьысьяс пиө! Сылөн сьөлөмыс оз лөнь, оз кө өні жө Сипсиклы отсав! Сійө вөрзис нин сливаясланьө бөр. Ану муніс надзөник, но падьявтөг, эз нин шенась кияснас. Сэсся сувтіс аканьыс дорө да шуис:

— Менам ичөтик повтөм Сипсик!

Сипсик сөмын нюммуніс сылы, сійө жө здукө Сипсиклөн сунис юрси пытшкысь качөдчис вельмөм чушкан да саяліс слива корьяс костө. Сідзжө и мукөд вогьясыс кутісны надзөникөн лөньны.

— Видзөд, сы мында слива тэ му вылас уськөдін,— шуис Сипсик да выльысь нюмьөвтис, быттө нинөм эз и вөвлы.

²⁵ *Вог* — чушканзі

Ану да Сипсик

Оти субөта рытө воисны Ану, Март, ай-мам да пөрысь мам дорө тьотныс да дядьныс пукавны.

Вобсыяс мөвпалөмаөсь: гөстиө мунігөн челядьлы пыр пө колө аскөд вайны кутшөмсюрө козиньяс. Та вөсна Анулы да Мартлы ёна кажитчывліс, кор наө воливлісны тьотныс да дядьныс.

Мартлы найө пырджык сетлісны конструкторьяс, а Анулы кутшөмсюрө аканьяс. Кыдзи позис чайтны, тайө пөрйө найө бара сетісны конструктор. Сөмын Анулы аканьсө эз нин сетны. Дядьөыс мыччис өти көрөб да шуис:

— Тэныд ми талун акань огө козьналө. Вайим тэныд гуаш мавтасьяс. Тэ ыджыд нывка нин да регыд мунан школаө. Тэныд сэки оз нин кут лөсявны аканьөн ворсөмыд.

— Аттьө, — шуис Ану.

Сылы гуаш краскаяс тшөтш ёна воисны сьөлөм вылас. Ану муніс мөд вежөсө да кутіс гуашөн серпасасыны.

Дзик пыр жө сы ки улысь петіс некымын серпас. Öти серпас вылын петкөдліс сійө тьөтөсө да дядьөсө. Мөд вылө серпасалис Мур нима каньөс. Коймөд вылын петкөдліс Сипсикөс. Аканьыс сылөн петөма дзик збыль Сипсик кодь.

Ану видзөдліс чачаясөн тыра аслас пельөслань, көні мукөд ворсаньяс кытшын пукаліс Сипсик. Анулы друг кажитчис, быттьөкө Сипсик талун мыйлакө гажтөм.

— Мыйла тэ гажтөм? — юалис Ану Сипсиклысь.

А Сипсик шуис:

— Ме абу гажтөм, ме мөвпалысь.

— Мый вөсна тэ сэтшөм? — юалис Ану.

— Ме ёна мөвпала,— шуис Сипсик.

— Мый йылысь нө тэ мөвпалан? — көсйысис төдмавны Ану.

И сэки Сипсик шуис:

— Ме мөвпала, мый тэ ыджыд нывка нин да мунан регыд школаө. Да сэсся ме чайта — регыд тэ он нин кут аканьөн ворсны.

Öні думыштчис тшөтш Ану. Сійө мөвпалис-мөвпалис, зумыштчис. Медбөрын сійө дзикөдз жугыльмис. Сійө мөвпалис: сійө быдмас да сэки, гашкө, сылы збыльысь оз нин ков сэсся ворсны Сипсиккөд. Мөвпалис нөшта, мый дзик нин верстьө йөз оз нин көсйыны аканьөн ворсны, көть аканьяссө найө радейтөны.

Медбöрын сэсся Ану сэтшöма жугыльмис, мый Сипсиклы ковмис сійöс öлöдны.

— Эн шогсы, — шуис Сипсик. — Ми öд век лоам öтлаын.

— Кызди ми öтлаын лоам, — шуис Ану, — кор ме сэтшöма быдма, мый, гашкö, ог нин кут кöсйыны тэкöд ворсны.

— Сэки тэ менö пуктан кытчöкö кыскан кудйö либö көрöбö, — шуис Сипсик.

— Мый тэ сэнi кутан вöчны? — юалис Ану.

— Ме кута сэнi казтывны, — шуис Сипсик. — Ме казтышта, кызди ми тэкöд ворсiмö, кызди тувсов ва писькöдiмö, кызди резина пыжөн кывтлiмö и керка вевт вылö кайлiмö да кызди чушканъяскöд тышкасим.

— Тэ кутан казтывлыны, — шуис Ану. — А мый сэки ме кута вöчны?

— Тэ корсюрö менö кутан көрöбысь судзöдлыны,— вочавидзис Сипсик.— Сэсся тшöтш казтыштан, кызди тэ мекöд ворсiн, тувсов ва писькöдлiн, кызди ми резина пыжөн кывтлiмö да керка вевт вылö кайлiмö да чушканъяскöд тышкасим. Тэ ставсö казтан, кутшöм ичöt кага тэ вöлiн да ворслывлiн на аканьясөн.

Сипсик сёрнитiс сэтшöм лöсьыда, мый Анулөн сёлöмыс неуна нормыштiс. Узян кадыс воис да Ану мамыслы шуис:

— Ме талун кöсья Сипсикöс ас дорö босьтны. Ме öд абу на сэтшöм ыджыд, мый Сипсик эз эськö вермы ме дорö водны.

Мамыс лэдзис Анулы босьтны Сипсикöс вольпасьö. Ану топöдiс Сипсикöс ас бандзиб дорас сэтчöдз, кытчöдз сылөн синьясыс эз куньсыны да ачыс эз унмовсы. Ану да Сипсик вöталiсны öти вöt.

ДОНА ЧЕЛЯДЬ!

Унаён тіян пиысь, тёдөмысь, казяліс бөрья кадө коми кивлысь
вежсьөмсө, выль кивьяслысь артмөмсө да налысь паськалөмсө. Тайö
небөгас тшөтш лои пыртөма кымынкө татшөм кыв. Водзö вайөдам найös
анбур серти сувтөдөмөн да налысь вежөртассö гөгөрвоөдөмөн. Выль
кывьяс отсөгөн ми ставным пондам сёрнитны да гижны сөстөмджыка,
чужан кывнымös татшөм ногөн сөвмөдам, вылөджык кыпөдам.

АЙМОРТ айлов, мужичöй
АНЬПЕЛЬ рыжик тшак
ВАТЛАН ведре
ВИСЬТКУД висьт чукөр, висьтъяса небөг
ВОГ чушкан, чушканзі
ГАЗВА лимонад
ГЫКУТАН антенна
КАНМУ страна
КОКСЯР пудбол
КОКСЯРАСЬНЫ пудболасьны
ЛИЧКАН кнопка
МУДОР суйөр, граница
ОЛАНПАС закон
ПУРЫСЬ улич
РУЧТШАК лисичка тшак
РЫТЬЯ НУР ужин
СЕРПАСКУД телевизор
СПОРТМОРТ спортсмен
СУЛÖК косөдчан, кичышкөд
СЯР мач
ТЕЛЕУДЖТАС серпаскудйын петкөдлантор, рочөн передача
ТÖВДÖРА парус
ТЮВГАЧ ракета
ЧÖЖ утка
ЭНЬЛОВ ань, нывбаба

Юриндалысь

| | |
|------------------------------------|----|
| Март, Ану да Сипсик | 3 |
| Анулён нимлунё | 4 |
| Анулён серпаскуд | 5 |
| Сипсик видзөдö пыстаясöс | 7 |
| Сипсиклөн гусятор | 8 |
| Сипсик да тувсов ва | 11 |
| Сипсик гольгö таксиён | 12 |
| Сипсиклөн Тöлысьö кайлём | 15 |
| Сипсик уялö саридзын | 17 |
| Сипсик керка вевт вылын | 19 |
| Сипсик тшак вотö | 22 |
| Сипсик — спортморт | 25 |
| Сипсик тышкасьö чушканъяскöд | 27 |
| Ану да Сипсик | 30 |

